

Opataia

Kapas akom

I. Iten ei puk: Opataia, pun mine a mak lon, an kapasen osuni. Wewen ei it Opataia: Nöün ewe Samol mi Lapalap chon angang, ika eman mi fel ngeni ewe Samol mi Lapalap.

II. Chon makei ei puk: Opataia

III. Itelapemongen ei puk: Lamalamtekia a akom mwen feiengau, nge tunosikesik a akom mwen än eman tur.

IV. Kapas aüchean ei puk: Kot a pwüng o allükülük, epwe aliwini ewe fanüen pwon ngeni chon Israel o apwüngü ir mi ü ngeni nöün aramas.

V. Masouen ei puk Opataia: Ese kon nien fat lon meni fansoun ei kükün puk a mak. Eli a mak mürin än Jerusalem tala lon ewe ier 586 mwen Kraist (B.C.), lupwen chon Etom ra pwapwaäsini talan Jerusalem. Chon Etom, fanüer a nom ötiörün ewe fanü Juta, ra opus chon Israel seni chök me lomlom. Nge iei ressap chök pwapwaäsini talan Jerusalem, nge ra pwal alisi chon Papilon le soläni pisekin chon Juta. Opataia a osuni pwe Kot epwe apwüngü o akufu chon Etom fiti chon ekewe ekoch mwü mi opus chon Israel.

VI. Tettelin masouen ei puk:

Kapasen osuni usun än Kot epwe apwüngü Etom
1.1-9

Popun än Kot apwüngü Etom 1.10-16

**Kapasen osuni usun än Kot epwe afeiöchüsefäli
chon Israel 1.17-21**

Kot a atekisonätiu chon Etom

1-16

¹ Iei osunien Opataia ren met Kot ewe Samol mi Lapalap a apasa usun Etom.

Sa rong ekewe pworaus seni ewe Samol mi Lapalap.

Eman chon künö a fen titila lemenen ekewe mwü o apasa,

“Oupwe amolakemiitää. Ousipwe maun ngeni Etom.”

² Ewe Samol mi Lapalap a üreni Etom,

“Üpwe akisuketiu me lein ekewe mwü.

Kopwe fokun küna koput.

³ Lamalamtekian lelukom a atupuketää,
en ewe mi nom lon ekewe föimw,
ka nom won ekewe leni mi tekia
o ekieki lon lelukom,

Iö epwe tongeni aturueitiu lepwül?”

⁴ Ika mwo ka föri imwom wilitekia
usun eman ikel a fas won leni tekia,
pwe ka usun chök nge ka nom lein ekewe fü,
nge üpwe chök aturuketiu me ikenan.

Ngang ewe Samol mi Lapalap üa kapas.

⁵ Iwe, are chon solä me chon angei pisek fän
pöchökül repwe tori imwom lepwin,

repwe chök angei üküküñ mine ra mochen.

Pwal ika chon ionifengeni föün irän wain repwe
toruk,

repwe pwal likiti ekoch föün.

Nge chon oputom ra fokun apöpökowu.

- ⁶ Ra silini än mwirimwirin Esau lenien iseis o soläni ar pisek mi aüchea.
- ⁷ Iwe, peliom meinisin ra atupuketä oasuukela seni fanüom.
Ekewe chon pwipwi ngonuk ra maun ngonuk, nge chienom kewe ka lükuur ra anomu eu sär fomw.
Ra apasa usum, ‘Ifa chök an tipachem?’
- ⁸ Lon ewe räni, lupwen üpwe apwüngü chon Etom,
üpwe arosala nöür kewe soutipachem o awesi ar mirit.
- ⁹ Iwe, ekewe sounfiu mi pwora seni Teman repwe rükö,
nge aramas meinisin lon Etom repwe kärila.
- ¹⁰ Pokiten ewe angangen mwänewis ka föri ngeni pwiüm kewe mwirimwirin Jakop,
kopwe kärila o itengau tori feilfeilachök.
- ¹¹ Lon ewe räni, lupwen chon ekis ra tolong lon asamalapen Jerusalem,
en ka chök ütä.
Lupwen ra uwala wöün pwe repwe üttüt won o ineti lefiler,
en ka chök usun eman leir.
- ¹² Nge en, esap öch om tuneämängau
won pwiüm kewe chon Juta lon räni ar weires,
esap öch om meseik wor lon räni ar feiengau,
esap pwal öch om tunesikesik lon räni ar riaföö.
- ¹³ Esap öch om tolong lon än nei kewe aramas we telnimw,
pwe kopwe tuneämängau won ar riaföö
o soläni pisekir lon räni ar feiengau.
- ¹⁴ Esap öch om ütä lepukopuken ekewe al,
pwe kopwe turufi ekewe chon Juta mi süla,

esap pwal öch om afangamäi ekewe mi chüen
manau
lon ränin ar riaföö. [◊]

¹⁵ Iwe, ewe ränin kapwüng a arapoto, lupwen
ngang ewe Samol mi Lapalap
üpwe apwüngü chon ekewe mwü meinisin.
Usun mine en Etom ka föri,
iei usun epwe pwal fis ngonuk.
Kopwe chök angei chappen om föför.

¹⁶ Iwe, usun nei aramas ra ün seni ewe kapen
feiengau
me won chuki mi pin,
iei usun chon ekewe mwü meinisin mi nom
ünüküür repwe ün.
Repwe ükün o tokorikirik,
repwe pwal mochola.”

Kot a atekiatä chon Israel

17-21

¹⁷ “Nge chokewe mi chüen manau me lein chon
Israel repwe nom won ewe chuk Sion.
Iwe, ewe chuk epwe eu leni mi pin,
nge ekewe mwirimwirin Jakop
repwe fanüni püsün fanüer.

¹⁸ Iwe, ekewe mwirimwirin Jakop repwe wewe
ngeni eu ekkei,
ekewe mwirimwirin Josef repwe wewe ngeni pu-
lopulen ekkei,
nge ekewe mwirimwirin Esau repwe wewe ngeni
fetilipwas.

Repwe arosala ekewe mwirimwirin Esau,
pwe esap chüen wor eman epwe manau.

[◊] **1:14:** Ais 34.5-17; Jer 49.7-22; Is 25.12-14; 35.1-15; Am 1.11-12;
Mal 1.2-5

Ngang ewe Samol mi Lapalap üa kapas.

¹⁹ Iwe, ekewe aramas seni ewe fanü Nekep mi
nom ör repwe fanüeni ewe fanü Etom,
nge chokewe seni ewe fanü Sefela mi nom lotou
repwe fanüeni fanüen chon Filistia.

Chon Israel repwe fanüeni ewe fanü Efraim me
Samaria,

nge aramasen Peniamin repwe fanüeni Kiliat.

²⁰ Ekewe sounfiu seni Israel mi oola
repwe liwinto o fanüeni Kanaan tori Sarefat,
nge ekewe chon oola seni Jerusalem mi nom Se-
farat
repwe telnimwensi ekewe telnimw lon ewe fanü
Nekep.

²¹ Iwe, ekewe chon pwora seni Jerusalem
repwe maun ngeni Etom o nemeni.

Nge püsün ewe Samol mi Lapalap epwe king.”

Paipel
The Holy Bible in the Chuukese language of the
Federated States of Micronesia

copyright © 1984, 1989, 1991, 2001 Liebenzel Mission

Language: Chuukese

Translation by: Liebenzell Mission

Old Testament © 1989, 2001 Liebenzel Mission New Testament © 1984, 1991
Liebenzel Mission

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-02-11

PDF generated using Haiola and XeLaTeX on 11 Nov 2022 from source files
dated 30 Nov 2021

c48fdfd7-5e91-508c-a792-018261cf838c